

AKASHVANI AIZAWL
REGIONAL NEWS BULLETIN
HEADLINES (EVENING)

Date – 02/09/2025

Time - 18:30 -18:40Hrs

- FOCUS 2.0 hmalakna tura thuneitu sang SCRAMe chu an Chairman Pu Lalduhoma, Chief Minister hovin vawiin khan Aizawlah an thukhawm.
- Sept ni 13-a Prime Minister Narendra Modi-a lo rawn zin tur dawngsawng turin inpuahchana ngawrh taka kalpui a ni.
- Prime Minister Narendra Modia chuan vawiin khan Semicon India 2025 New Delhi-a Yashobhoomi ah a hawng.
- Ruahsur nasa avangin ramchhung hmun thenkhatah harsatna a thleng mek



SCRAM MEETING

FOCUS 2.0 hmalakna tura thuneitu sang Society for Climate Resilience Agriculture in Mizoram (SCRAM) te chu an Chairman Pu Lalduhoma, Chief Minister hovin vawiin khan Aizawlah an thukhawm.

FOCUS 1.0 hnathawh hun chhung a zawh tawh avangin Mizoram sorkar chuan FOCUS 2.0 hmalakna hi Handholding Scheme nena kal dun tura kalpui leh a remti a. International Fund for Agricultural Development (IFAD) sum cheng vbc 380 hman phalna hi State sorkar Finance Department chu pe tawhin, sorkar laipui lamah dilna thehluh mek a ni a. Department hrang hrangten hma an lakhona (convergence) a nih angin Planning & Programme Implementation Department hnuaia kalpui tur a ni ang.

Meeting hian FOCUS 2.0 project mil turin kalphung thenkhat thlak an remti a, nihna hming (nomenclature) thenkhat thlak an rem ti bawk a, FOCUS 1.0 atanga bungrua leh hmanruate chhawm chhoh dan turte an rel a, state Level leh district level-a thuneitu turte, Village level-a thuneitu turte an rel a, hnathawktu tur pawh khawm dan tur leh a tul anga lak dan turte pawh an sawi.

FOCUS 2.0 hi district 11 a khaw 700 tuama chhungkaw 75000 huama kalpui tur a ni a. Ram nei lo chhungkua pawh chhungkaw 7000 target siam a ni. A chhawrtu zatve hi hmeichhia ni thei tura duan a ni bawk.

Meeting-ah hian Agriculture Minister Pu PC Vanlalruata, Land Resources, Soil & Water Conservation Minister Pu Lalthansanga, Adviser to CM Pu TBC Lalvenchhunga MLA leh Dr. KC Lalmalsawmzauva leh official pawimawh te an tel a ni.



LADC SESSION

Lai Autonomous District Council, Emergency Budget Session ah

LADC Budget 2025-2026 cheng Nuai sing 2, sang 6, za 3, sawm 5, panga POINT bial pasarih chu vawiin khan eptu te tel lova pass a ni.

Session tawpni vawiina pass tak budget hi Chief Executive Member Pu N.Zangura'n House a a pharh tawh LADC Budget 2025-2026 leh Demand for grant 2024-2025

leh Chhiah tling khawm atanga hmuh beisei, avaiin cheng Nuai sing 2, sang 6 a ni. Chief Executive Member Pu N.Zangura chuan hun reitak LADC Sorkar buai vanga mipui leh hnathawktuten an an tawrh hnu ah Budget passed a ni ta chu lawmawm a tih thu a sawi a ni.

Vawiin chawhma session ah Deputy Chairman thlan niin, Sangau South bialtu MDC, Pu JB.Vanhoy chu chuhtu awmlovin thlantlin a ni.

Kan corr report lo ngaithla ang.

Lai Autonomous District Council, Emergency Budget Session hi August 29 khan tan a ni a, Eptu lam ten Session chu dan kalha koh ni a sawiin, inhnial buaina karah Chairman chuan Session a titawp lailawk a, Thawhtanni chawhma lam ah Eptu Member ten sawisel chhunzawmin inhnialna kar ah Chairman chuan Session a titawp lailawk leh a, Eptu Member ten House pawh an chhuahsan nghe nghe a, session tawpni hian chawhma leh chawhnu lam ah Eptu Member ZPM Legislature Party te Session ah hian an tello bawk a ni

<><><>

INTACH MIZORAM CHAPTER

North Khawlek khaw bul Thingkhuang ngaw pûka ruhro thahnem tak hmuh chhuah chu kum 700 liamta vel ami, AD 1260 -1320 inkara mite an ni tih finfiah a ni.

INTACH, Mizoram Chapter hotute chuan vawiin khan Aizawl Press Club-ah thuthar thehdarhtute kawmin he thu hi an sawi a, INTACH Mizoram Chapter convener Pu Rin Sanga, IAS (Rtd) chuan, ruhro te chu North Khawlek khawtlang hruaituten zirchiang tura an ngen angin an zirchian thu a sawi a, ruhro hmuh chhuah zing atang hian uluk takin carbon-14 dating tihna tur sample lak niin, he’ng sample-te hi khawvela laboratory hmingthang Beta Analytic, Miami, Florida, USA-ah thawn a nih thu a sawi.

INTACH, Mizoram Chapter hotute tarlan danin, ruhro awmna pûkah hian kumin January ni 11 khan Khawlek khaw mi Laltlanhlua chu lutin, ruhrote hi a hmu a, May ni 2 khan INTACH Mizoram Chapter chuan Art & Culture department-a archaeologist Vanlalthuma Singson leh HATIM, Lungleia assistant professor Dr Lalhminghluate nen Thingkhuang ngaw pûk hi a hmunah an tlawh a, ruhrote hi an zirchiang a ni.

Pûk hi Vanbawng leh North Khawlek khaw inkar kham panga awm niin, lei atangin feet 50 vela sanga awm a ni a, pûk chhungah hian mihring ruhro thahnem awmin, chu’ng zingah chuan luruh keh leh a keh lo pakua leh taksa peng dang ruh bakah, bêl kehthem engemawzat a awm a ni.

<><><>

PM VISIT PREPAREDNESS

Sept ni 13-a Prime Minister Narendra Modi-a lo rawn zin tur dawngsawng turin inpuahchana ngawrh taka kalpui a ni a,

Vawiin khan Aizawl Municipal Corporation (AMC)-a thawkte chuan Aizawl Mayor Pu Lalrinenga Sailo leh Municipal Commissioner Pu Joseph H. Lalramsanga hoin Chaltlang Veng leh Chanmari Veng inkar kawngpui leh a chhehvel tihfai hnatlang an nei.

AMC hian Prime Minister rawn zin tur pual hian a hmaa an lo tihfai tawh Dawrpui leh Zarkawt venga retaining wall-te chu rawng an hnawih nghal bawk.

Kan corr report lo ngaithla ang.

India in kumpuinu awpna hnuaia zelenna a hmun kum 78na hman mekah, Mizoram chu a vawi khat nan state dang atangin relin a chhun tlang ve dawn ta a, September ni 13-ah Prime Minister Pu Narendra Modi an a rawn hawng dawn a ni. Prime Minister-in Aizawl a rawn zin huna a palitlang tur veng 14-a Local Council hruaitute chuan AMC-in a ngen angin an veng theuh tihfai hna an lo thawk tawh a; Lammual bawlhhlawh thenfai hna thawh a ni tawh bawk.

AMC hian thla hlui August ni 27 khan thu chhuah siamin, Prime Minister-in Aizawl a rawn tlawh dawn avangin Thuampui Helipad atanga Lammual inkara kawngpui (Chaltlang leh Ramhlun) leh a chhehvela bungraw dah hnawkte chu tun thla ni 5 ral hma ngeia senghawi vek turin a hriattir a. Workshop hrang hrang leh dawr siamte chu an hmunhma tifai tur leh an bungruate dawr chhunga senglut vek tur in a hriattir bakah, office-te pawh an hmunhma tifai turin a ngen bawk a ni.

Chief Secy Pu Khilli Ram Meena-a hovin Prime Minister lo dawnawn dan tura inbuatsaihna hi sorkar lam chuan a ngawrh chho hle a, venhimna tha taka kalpui dan tur te, Lengpui, Thuampui leh Lammuala hun hman dan tur te leh Mizoram kutchhuak thuam, thlai leh thei chi hrang hrang pholan dan tur te sawi a ni a. Hun pui ber hmanna Lammualah hian Aizawl District huam chhunga Sawrkar hnathawkte, Kuthnathawktute, School zirlai leh College zirlaite an tel theih nana ruahmanna siam dan tur sawi a ni bawk.

Veivahna kawnga harsatna a awm loh nan lirthei hunna tur hmun ruahman dan tur te, kawng leh a chhevel tihfai leh chei dan tur te sawi ho a ni bawk.

<><><>

MEGA OIL PALM PLANTATION DRIVE

Kolasib ah Mega Oil Palm Plantation Drive hman a ni a. He hun hi Dy Speaker Pu Lalfamkiman a hman pui a, loneitute hnena a thlawna sem tur Oil Palm tiak thahnem tak a vailiam nghal a ni.

He huna tarlan anih danin, Kolasib leh Mamit ah Godrej Agrovat hnuaiah oil Palm chinna zau zawng chu ha1776 a ni a, loneitu 1030 in an ching a ni. Kolasib bikah ha 313 a rah hralh theihna a awm a, ha 485-ah a la sen avangin hralh theih a la ni lo a ni. Kolasiba Oil palm chin mek zau zawng hi 798 ha a ni a, a chingtu, Farmer 496 an awm a ni. Oil palm hi tun sawrkar kum kalmekah loneitute hian cheng vbc 1 leh nuai 43 vel an hralhchhuak tawh a, cheng vbc 3 man hu vel hralhchhuah leh beisei a ni.

Kan corr report lo ngaithla ang.

Oil Palm Mega Plantation Drive hi District Agriculture Officer Pu Joseph Lalnunluangan a a kaihruai a, Kolasib District chhunga Oil Palm chingtute leh oil palm chin chungchanga hriat belh duh mi thahnem tak an kalkhawm a ni.

He huna tarlan anih danin, Sawrkar in Oil Palm chingtute tan hamthatna tamtak a siam a, chungte chu, a thlawna a chi tiak te loneitute hnena sem te, Oil palm rah hun, kum li hma a oil palm nena phun kawp tur thlai ngaihtuahpuite, leitha a enkawl man tur bituk chin tum pui te, tuipekna hmanrua, link road siam leh

repair te leh thil pawimawh dang te ah a tul dan ang zelin sawrkar in a pui thin a ni. Heng bakah hian mamawh hrang hrang lakkhawmna tur One stop solution pawh Bukvanneiah din a ni a, hmun dangah pawh din belh zel tum a nih thu dawn a ni bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan vawiin khan Semicon India 2025 New Delhi-a Yashobhoomi ah a hawng. Thusawiin PM Modia chuan khawvelin India a ring tawh tih sawiin India-a semiconductor hmunpui siam turin a inpeih a ti a. Tun atanga hun reiloteah India-a chip tereuhte hian khawvelah danglamna lian tak a la thlen dawn a ni a ti a. Kum 2021 atangin semiconductor project 10 din tura pawm tawh niin a hlut zawng pawh dollar tluklehdingawn 18 hu a ni a ti a. Sawrkarin tun aia changtlung zawk hmalakna a nei thuai dawn tih a sawi bawk a ni.

<><><>

RAIN HAVOC

Ruahsur nasa avangin ramchhung hmun thenkhatah harsatna a thleng mek a. Jammu and Kashmir ah chuan nizan atanga ruahsur nasa chuan hmun tam takah tuitling siamin lirthei veivak leh mipui nitin khawsak a ti khaihlak a. Ruahsur nasa vang hian Shri Mata Vaishno Devi Ji tlawh theih hun pawh ni 8 chhung tihtawp a ni tawh a ni.

Himachal Pradesh ah pawh ni thum chhung ruahsur nasa vangin mipui nunphung a khaihlak a. District pathum Kangra, Mandi leh Sirmaur ah chuan Met Department-in ruahpui vanawn sur turin a sawilawh a. Heng district ah te hian inralring tura hriattirna red alert puan a ni. Leimin avangin national highway paruk a ping a. Kawngpui 1305 chuang pingin electric transformer 3263 a chhia a. Tui in tur pekchhuahna hmun 858 ah a chhe bawk a ni.

Punjab ah pawh tuilian nasa tak avanga chhiatna thlengah mi 29 an thi tawh a. Ruahsur nasa avang hian Bhakra Dam leh Ropar Head Works ah te tui a liam nasat avangin Ghaggar, Markanda leh Tangri luite a lian nasa hle a. Patiala leh Jalandhar hmun thenkhatah tuilian hi an tuar nasa ani. Idnian Army, Air Force, BSF, NDRF leh NOG hrang hrangten chhanchhuahna leh chhawmdawl hna an thawk mek a ni.

<><><>